

近代中國史料叢刊第二十三輯  
沈雲龍主編


咄

咄

吟

貝青喬著

文海出版社印行



吳興劉氏  
嘉業堂刊

## 自序

道光二十一年十月二十日揚威將軍奕經奉

旨進勦寧波嘆夷道出吾蘇駐節滄浪亭行館僕投效  
軍門荷蒙收隸麾下隨至浙中始命入寧波城偵探夷  
情繼命監造火器尋又帶領鄉勇派赴前敵終命幫辦  
文案入核銷局查造兵勇糧餉清冊被逮後又命列敘  
軍務始末繕具親供備刑部入奏故於內外機密十能  
言其七八顧一載之中委蛇戎馬閒毫無建豎以爲涓  
埃之報媿已而獨有所不解者當其初糧餉未足兵勇  
未集器械又未備利不在速戰而督撫促戰之使日三  
四至卽將軍亦若大功可唾手成乃一經小挫眾心換

散不復整齊之以圖再舉而坐視暎夷之大肆其毒是  
可怪已且軍興以來奏撥餉銀各督撫動謂經費有常  
及與暎夷賄和則竭數省藩運道庫數百萬之多而不  
之顧惜數不足則設法令紳士捐輸又不足則刻期書  
券以俟按年發給若惟恐暎夷之不飽其欲者夫以此  
巨餉何不可戰卽不可戰何不可守乃各大臣旣甘心  
與犬羊之族爲城下盟而將軍亦作壁上觀不發一語  
是更可怪已他若夷情緩急郡縣官祇稟報督撫而不  
及將軍凡事民間業已喧傳而帥府尙須探聽各督撫  
旣不相咨商又不相知照遂至江蘇已經修好而浙江  
尙議進兵歧路傍徨轉爲暎夷所笑又若調募兵勇全

無節制驅之使戰遇賊卽逃旣潰之後並不加罰甚且將軍派某人爲統領督撫又派某人爲隊長非但將與兵不相識并兵與兵亦不相知此數端殆積弊使然耶抑權不足以相統而至此耶雖可解也而亦可怪也雖然國家承平旣久一旦命將出師徵調絡繹徭役繁興固已擾商旅駭閭閻人心搖搖怨黷四起又況一將出京從官數十非若外任督撫使屬員如臂指書吏隸役一一有成例可循營中則凡事須憑空創起總理軍機者爲印務處專管兵籍者爲營務處主檔冊者爲文移處主刑法者爲文案處以及糧臺支應局翼長等處一處派官三四員一員帶供事戈什哈及幕友家丁十

餘人一城之中忽添此數十官員而且將軍之外復有參贊參贊之外復有欽差欽差之外復有小欽差彼其麾下亦各有印務營務文移文案等處體統愈尊則郡縣官之供應愈煩郡縣官之供應愈煩則督撫之袒護愈甚又況隨員之中良莠不齊廉墨並立非其親戚故舊卽係出京時王公大臣所推薦不得不委曲瞻徇而其人直視軍營若利藪法紀聲名罔所顧慮督撫乃咎及主帥而菲薄之郡縣官又迎合上官意旨而詆諆之或且阻撓之於是主客相齟齬滿漢相傾軋文武相推諉兵民相疑忌而主帥遂成怨府矣幸而得勝猶可箝眾口一不勝而訕笑滿前轉若以喪師爲快此欲求免

於共事者之見侮且不可得何暇謀敵噫同爲國家  
大臣而以睚眦之忿自分畛域若此是誠何心哉然使  
爲之帥者申明賞罰訓練士卒結之以腹心馭之以智  
術濟之以威權激厲眾志而作之氣猶可說也而又不  
出此今日議戰明日議和務求一萬全之策惴惴焉不  
敢輕於一決究之敵東亦東敵西亦西蒼黃應援疲於  
道路卒使海疆數千里逆燄如沸羹幾幾不可撲救此  
固近日行軍之通弊乎而實誰之咎哉計自將軍南下  
以至蕞事徵兵一萬一千五百人募鄉勇二萬二千人  
用餉銀一百六十四萬五千兩籌畫一載而卒收功於  
通商之議惜哉僕本書生不習國家例案何敢妄置



一詞然軍旅之中聽覩所及有足長膽識者暇輒紀以詩積久得若干首加以小注略述原委分爲二卷題曰咄咄吟言怪事也今軍務旣竣矣回憶前事歷歷具在其果可解也耶抑不可解也耶姑筆諸書以俟夫後之解之者

題詞

昨從海上駕帆來

甲辰夏余自閩還  
吳由海道而行

鵬紅詞客

親見飛濤卷礮臺

番舶晝開軍鼓靜舟山秋霽陣雲開亦知議戰非長策

可惜安邊少將才回首沙場成一喟如麻白骨蔽荒萊

書生似爾膽真豪上馬曾揮殺賊刀詩史一編傳杜甫

良家十郡感陳濤蠻奴蝴蝶新番陣上將鴛鴦別演翰

孤負封侯年少夢團花空黯舊征袍

豈無上計策陳平已報黃金鑄幣成壯志何難乘破釜

奇功容易說翻城半江木葉秋鳴角一嶺梅花夜撤兵

終是金川軍力奮頭顱五百送田橫

鄧征西更杜征南可解猿公劍術參籌筆未成吾輩老  
犁庭有策幾人諳詩真自足垂懲勸權在何妨使詐貪  
不解文臣偏惜死酬功 聖主最恩覃

無際盦主

濁酒難澆磈礪平撫膺往事歎無成和戎果否收全效  
聞道中朝厭論兵

一番遊戲棘門軍坐嘯胡牀待策勲遼海歸來雙鬢改  
上書應悔學劉蕡

杜甫蒼涼詠八哀戰場親見國殤來行閒功臯模糊甚  
合讓詩人有史才

鐙前拍手唱烏烏贏得隨身一劍孤儻幸羌村長穩住

閉門種菜計非迂

鷗波老漁

慷慨從軍樂悲歌行路難正愁兵氣惡那得賊心寒師  
已姦胥漏刑偏愛將寬此中成敗局冷眼有人看

浪說翻城策同糜報國身英才誤庸帥敗績見完人

帶汁逃羞葛張髯怒奮巡忠魂奇句慰斗大走青燐斗

青燐走國殤  
集中句也

幕府清流集軍門廣廈開鳳鳴驚一士狗盜笑羣才義

旅官能冒奇功世共猜指補陀  
洋之捷勞君磨盾記抵得策勲

回

並海鋒纜挫橫江燄又驚帳中方坐嘯城下已聯盟券

合藏金匱錢難算水衡空教授筆者詩史擅才名

炳燭子

孰挂東南半壁傾頻頻節鉞寄專征似聞幕府英流集  
卻讓書生力請纓

爭思賞博爛羊頭幾見渠殲血鬪髓閒煞羽書磨盾鼻  
壯心聊付管城侯

秋窗鐙火一編披憤激談諧並有之魑髻未禽裁露布  
禡牙將祭漏師期

不勦還能就撫無浙西蹂躪又東吳局中功罪分明甚  
賴有才人記事珠

蓮花庵居士

東南鎖鑰竟如何偏是儒生感慨多  
詩史卽今功罪定羽書當日見聞訛  
空煩白簡彈房琯又費黃金下尉佗  
戎馬場中經歷久請纓壯志轉消磨

海氣沈山不放青礮車聲怒卷飛霆  
荒村夜宿陰燐暗廢壘春耕戰血腥  
幕府籌邊餘涕淚封疆報國在調停  
歸來收拾弓刀夢且閉柴門讀武經

看雲僧

拔劍出門去行轅力請纓防邊無健將  
殺賊有書生冷眼軍前事傷心城下盟  
誰憐磨盾墨空博著書名節鉞專征日  
胡牀坐嘯時狎朋參將略姦吏漏師期  
霸棘軍如戲陳陶死可悲駱駝橋上望  
戰血洗江湄

一蹶勢難振三軍氣不揚催輸投鼠雀媚敵獻牛羊  
紅粉藏官舫青燐泣戰場和戎眞上策從此息兵防  
軼事從頭記千秋作笑端然犀情畢現談虎膽猶寒兵  
旅何年整邊才自古難殘編須護惜休與外人看

咄咄吟附錄終

咄咄吟目錄

卷首

自序

題詞

卷上

七言絕句六十首

卷下

七言絕句六十首

卷末

自跋 附述懷絕句五首



The image shows a blank ledger page with 11 vertical columns. The columns are of varying widths, with the first column on the left being the widest and the columns on the right being progressively narrower. On the right side of the page, there is a header area containing the text "ITEM" written vertically. Below the table area, the page number "16" is printed at the bottom center.

ITEM

咄咄吟卷上

木居士著

嶺南高築受降城，魁結披猖自敗盟。仰見雷霆天怒赫，軒弧舜戚復東征。

嘆夷之擾我海疆也。自兩廣總督林則徐、閩浙總督鄧廷楨、大學士琦善、伊里布或主戰或主撫，兩載於茲，終無成局。上乃斥林、鄧等四人，命靖逆將軍奕山、參贊隆文、楊芳統大兵赴粵，進剿之戰稍卻。嘆夷益猖獗，奕山等遂竭帑藏及洋商伍潘等姓銀六百萬兩，厚犒之。嘆夷乃罷兵。時新任閩浙總督顏伯燾、浙江欽差裕謙猶主進剿之議，故嘆夷自粵引兵而

東攻陷福建廈門未幾又陷浙之定海鎮海兩縣及  
寧波郡城裕謙及四鎮王錫朋鄭國鴻葛雲飛謝朝  
恩死之事聞 上震怒復命揚威將軍奕經參贊文  
蔚特衣順督師赴浙并飭各省會剿云

相公推轂重朝班一意長區破蔡還滿望凌煙今代閣  
威名襲鄂定堪攀

將軍奕經

高宗純皇帝曾孫成親王永理孫

也少以待衛從軍喀什噶爾積功仕至協辦大學士  
上頗倚重之故有是命初琦善以直隸總督誤信  
漢姦之言奏參林則徐嚴辦粵東鴉片煙不足服嘆  
夷心 上乃革林職而以琦善代之琦善至粵撤防

主款迭爲嘆夷瀆請并割香港與之夷心猶未饜攻  
陷大角沙角虎門等處琦善仍勒兵不戰致提督關  
天培副將陳連升及其子陳鵬舉等援絕陣亡上  
聞之大怒下琦善刑部獄及將軍奉命出征大學士  
穆彰阿奏請帶琦善赴浙將軍謂琦善可與議撫不  
可與議戰特嚴卻之而挺身南下云

阿父雄心老未灰酒酣猶是夢龍堆呼兒一劍親相付  
要濺樓蘭頸血回

家大人喜談兵曾在宮保盧坤幕中當公平定逆回  
張格爾及猺匪趙金龍之亂不得親在行間嘗引以  
爲憾及嘆夷滋擾閩浙僕嘗作雜歌九章以寄慨家

大人見之謂兒有敵愾之志兒何弗從軍也僕遂詣  
軍門投效瀕行時授兒一劍并作詩相助有不斬樓  
蘭莫便回之句

附雜歌九章

朔風吹決黃河口沐梁城外蕩如藪又驚閩浙軍書  
來廈門甬江兩不守是時吾蘇樂有餘彼憂天者人  
謂愚八月同慶 聖壽節笙歌夜夜喧街衢

實我倉穀城我城倡議乃有鄉先生又聞大吏議防  
堵六門設兵三百名錢塘郵報寇氛遠三日聚謀謀  
漸緩天邊星使紛南馳火速辦差置行館

有客有客議團練肝膽照人人不見或言避城或避

山皇皇徑欲棄鄉縣壯夫有血吹不涼酌酒誰與歌  
同裳三更起拔長劍舞雄雞喔喔天雨霜

野雉飛匿草田裏知畏其首不畏尾陡然驚起復遠  
颺終入庖人湯鑊底出門滿地皆網羅椎埋如爾惡  
少何秋霖未集已先徒有智不如螳在柯

朝見兵船海上去浙東議戰要防禦暮見兵船海上  
來粵東議和仍撤回兵船來往日如織官符捉船船  
戶匿商旅坐愁行路難江湖滿地生荆棘

兵災水災相比連斗米五百青銅錢救荒有例免關  
稅日望漢陽來米船霜風凜凜雨霎霎黃雀苦飢啄  
菜甲此時民愁官亦愁糧艘已下天妃閣

吸煙者絞販煙殺禁絕煙匪有嚴法爰書三載下縣  
官縣官奉行緝保甲黃流滾滾源不澄閭閻積嗜終  
莫懲兵塵日近煙日賤白晝尸臥開帷鏡

豫東築隄河之澗一寸黃金一寸土海疆籌餉兼募  
兵司農捐例新頒行貲郎慕義爭報國上賞優至二  
千石嗟爾下土棲蓬蒿閉門臥讀劉蕡策

桁無完襦甑無粟老妻瑣瑣辦冬蓄汝飢汝寒且勿  
言世上瘡痍紛滿目風稜刮面霜葉枯敗牖歌出聲  
烏烏唐衢有淚不敢哭痛飲一醉求模糊

匱啟金滕選俊髦芻蕘采取到吾曹錦囊爭獻籌邊策  
好檢礪谿古豹韜

初將軍奉 上諭凡文武員弁及士民商賈中有奇材異能或一材一藝者均准詣軍前投效有功從重獎賞故自渡江以後營門外特設一木匱願投效者許納名其中三日後傳見有能稔知夷務者亦許密陳得失於是獻策者凡四百餘人投效者一百四十人僕因得濫入幕中及將軍駐節嘉興麾下隨員恐人攻發其私慫恿將軍收去木櫃不許密陳并投效之例亦因以閉

大燾臨風凍不翻雪花如掌沒行轅何堪促戰三更急  
警報妖氛撲斗臺

將軍奏調陝甘川黔各省兵一萬人奏撥戶部餉銀



一百萬兩適屆嚴冬積雪高四五尺道路冰塞不能  
刻期南下故駐札蘇州以俟各路兵餉而嘆夷聞有  
進剿之旨益逞其毒迭犯慈谿奉化餘姚三縣城  
浙江巡撫劉韻珂畏怯屢請將軍進兵時將軍麾下  
祇南陽營兵一千人南河總督麟慶借餉銀二萬兩  
鎮江府祥麟借餉銀四千兩江蘇布政使程喬采借  
餉銀一萬兩均不敷用故未進兵而韻珂以爲有意  
遲延遂與將軍有隙韻珂派來文武巡捕官每以將軍動作密報將軍惡之呼爲監  
軍嫌隙之生此亦一端斗臺餘姚地名俗呼斗門

銅柱爭思快勒名參謀賓從聚如萍鳳皇池上絲綸客  
贏得詩人賦小星

初將軍隨員六人郎中賈承蕃員外阿彥達御史胡元博主事楊熙七品筆帖式聯芳中書張炳鑽奉

旨帶赴浙營聽候差委故六人恆以小欽差自居提鎮以下進見必長跽相稱必曰大人後并投效人員

主事陳宗元郭維鍵指揮汪傳霖等亦自附於大人之例顧大人既多傾軋漸起同列中中書官級最卑

或戲炳鑽曰小星小星謂星使之小者或曰端木詩

詩皆以爲小星小臣奉使之詩此用古經義旋乃互相嘲謔赫赫大人均

稱小星矣

怪底籌帷勢孔艱妖訛萬口不能關難將敵虜交歡意移入雙旌六纛間

初暎夷陷寧鎮定三城督令民人王日豫寄書巡撫  
劉韻珂欲引粵東之例索餉犒師韻珂饋送牛羊約  
以暫緩時日暎夷果不進犯是以韻珂頗德之又因  
將軍遲不發兵奏請前任大學士伊里布至浙仍主  
撫議而謂將軍逗遛蘇郡恐不足以了此事江蘇巡  
撫梁章鉅於冬至賀節時眾中傾仆狀若中瘋奏請  
開缺養病而摺中亦涉及將軍辦事迂緩兩江總督  
牛鑑因防堵吳淞口奏調河南營兵一千人令壽春  
鎮總兵尤渤帶領渡江適遇將軍於京口驛將軍遂  
奏留麾下不聽其赴吳淞是以鑑與將軍亦有隙參  
贊特依順自粵東來蘇亦主招撫與將軍議又不合

由是各帥意見紛歧訛言四起而將軍轉成孤注矣  
虎牙環立視眈眈駭聽懸河坐上談昨日請纓今請劍  
帳中原自有奇男

舉人臧紆青宿遷人將軍故友也慷慨多大志初將  
軍出都時或戰或撫游移兩可紆青極言歷年招撫  
毫無成效且恐有損國威將軍之志乃決及渡江  
後聞浙中官弁遇賊卽潰請將軍奏斬提督余步雲  
知府黃冕鄧廷彩同知舒恭受等各逃官以立威望  
將軍從其言摺甫欲上適奉廷寄批回浙撫劉韻  
珂蘇撫梁章鉅二摺傳旨申飭用是將軍惴惴自  
危而請斬逃官之議遂寢

東南扼要兩分兵千里潛師夜斫營果有岳侯神算在何難唾手復三城

將軍因浙省兵弁自欽差裕謙死難後迭次潰逃不

堪臨陣且其中多藏漢姦尤恐語言漏洩

是時鬪內防範極嚴

密出入必校對腰牌稟事不得直白必用小牙版

書隨覽隨拭以防左右耳目蓋其初軍機固若是其

慎也故特令前襄陽知府金石聲應州知州段洪恩游擊劉天保等赴山東河南安徽各省召募鄉勇密令

伏入寧鎮定三城而以陝甘川黔勁兵兼程進擊之

此將軍之初策也繼因道路遼遠不能兼顧遂分派

泗州知州張應雲駐曹娥江接應寧鎮二城事宜謂

之南路海州知州王用賓駐乍浦接應定海一城事

宜謂之東路

金牛頓隔萬重山一月猶稱火速還惱殺江風連夜急  
又催雁信下雲間

浙撫劉韻珂以將軍久駐蘇州頗多疑忌嘆夷陷奉  
化之信故令驛中遲遞延至二十七日始自杭達蘇  
將軍得報入奏而韻珂之摺久已批回將軍怒嚴查  
遲遞之故欲懲辦驛官繼知旨出韻珂乃遂隱忍中  
止然已奉 上諭申飭矣將軍謂驛吏多貽誤且來  
文每被私拆恐有漏洩派員別設水站以通往來既  
而進駐杭州有密札詰問張應雲伏勇一事特遣家  
丁尚祿齎往曹娥江乃尚祿問路於驛吏誤曹娥爲

吳淞遂北走松江府迫其回營而寧波已敗績矣  
長年倚柁馬騰槽奉檄憐他倦伐礮不有嘉禾疆項令  
早應相犯到秋毫

將軍駐節蘇州兩月隨員中頗有向州縣官需索者  
差役繁興怨言四起蓋江蘇官以辦差之久而怨浙  
江官以辦差相待之久而亦怨也既而道出嘉興參  
贊文蔚之僕某妄有徵求直入縣署肆鬧秀水知縣  
殷焯達坐堂皇掌責之懷印詣轅門聽參文蔚甚怒  
將軍排解之乃罷舉人臧紆青因勸將軍行文各州  
縣凡大兵過境祇須整備夫馬船隻餘皆飭支應局  
供給云

一劍如霜放膽來蛟門蟹浦路  
潑洄前驅莫笑書生懦  
虜腹中間去復回

將軍分遣投效人員編修朱楷

廣西臨桂人前以翰林大考懷挾黜革發

配天津今徒罪期滿來軍中投效

知州聯璧縣丞錢肇錦等二十五

人潛入寧鎮定三縣城偵探夷情并查看進兵之路  
僕與廣西拔貢生銀沆同行由上虞餘姚取道後山  
北之鳴鶴場其地富戶多設鄉兵誤疑僕爲漢姦執  
送場大使葉天培出衲衣中印札示之始得解繼募  
鄉導余功葉安邦引入寧城時嘆夷在城內者不及  
三百人城外泊夷船兩隻然巡邏頗嚴密僕進鹽倉  
門時盤詰數四幾不得入并見城上懸一首級下揭



告條大書清官呂泰來來探軍情故臬示云云呂亦  
將軍所遣也

附留別家人作六首

陋儒不自量奮身入虎隊戎服夜歸家里老共驚怪  
排闥相問訊環集一鐙對此行實齒莽擲掄亦吾愛  
槍茲歲將暮兵氣昏曖曖三日釀成雪風刮下雲背  
融入萬竈煙凍合一天晦明當具刀裏前驅敵王愾  
今宵姑作歡貰酒澆胸塊四座各贈言書紳以爲佩  
酒罷還入內擁髻視吾婦昵昵牀第私壯夫得毋醜  
十年結髮情忍遽棄之走吾婦頗會意笑言承吾後  
叮嚀數寄書用慰姑與舅鍵戶相對貧菽水尙多負